

17 JUN 2000
Mahathir-G15

DR MAHATHIR TIBA DI KAHERAH UNTUK SIDANG KEMUNCAK G15

Oleh: Ahmad Zukiman Zain

KAHERAH, 17 Jun (Bernama) -- Perdana Menteri Datuk Seri Dr Mahathir Mohamad tiba di sini Sabtu untuk menghadiri Sidang kemuncak ke-10 Kumpulan Negara-negara Membangun (G15).

Dr Mahathir, yang diiringi isteri Datin Seri Dr Siti Hasmah Mohamed Ali, tiba di Lapangan Terbang Kaherah pukul 7.50 malam waktu tempatan (12.50 pagi waktu Malaysia).

Beliau disambut oleh Menteri Luar Datuk Seri Syed Hamid Albar, Menteri Perdagangan Antarabangsa dan Industri Datuk Seri Rafidah Aziz dan Duta Malaysia ke Mesir Datuk Haji Azman Mohamed Nazir dan para pegawai.

Persidangan kemuncak selama dua hari itu akan dirasmikan oleh Presiden Mesir Hosni Mubarak di Presidential Headquarters, Heliopolis di sini Pada Isnin.

Selain menghadiri sidang itu, Dr Mahathir mempunyai jadual yang ketat termasuk ceramah di Centre for Asian Studies di Cairo University pada Selasa.

Beliau juga akan menandatangani Memorandum Persefahaman antara Perbadanan Pembangunan Multimedia (MDC) dan Kementerian Komunikasi dan IT Mesir sebelum ke universiti itu pada Selasa.

Dr Mahathir dijadual menemui sektor swasta Mesir dan melawat ke pertubuhan perniagaan terkemuka Mesir, the Oriental Group di 10th Ramadan City esok.

Pada Rabu, Perdana Menteri akan menemui pelajar Malaysia dan mengadakan persidangan media dengan media Malaysia sebelum mengakhiri lawatan.

-- BERNAMA

AZZ FAZ